

QENDRA PËR NISMA LIGJORE QYTETARE
Zyra për Mbrojtjen e Qytetarëve
Aleanca Gjinore për Zhvillim
Linja e Këshillimit për Gra dhe Vajza
Strehëza për Gra dhe Vajza
Linja e Ndihmës për Fëmijët - Tiranë
Qendra për Mbrojtjen e të Drejtave të Fëmijëve në Shqipëri - CRCA
Qendra e Informacionit dhe Kërkimeve për të Drejtat e Fëmijëve në Shqipëri - IRCCRA
Komiteti Shqiptar i Helsinkit
Koalicioni kundër Trafikimit dhe Shfrytëzimit Seksual të Fëmijëve në Shqipëri

Tiranë, 31 Maj 2007

DEKLARATË PËR SHTYP

HYN NË FUQI LIGJI KUNDËR DHUNËS NË FAMILJE

Nesër, më 1 Qershor, në ditën ndërkombëtare të fëmijëve, hyn në fuqi ligji “*Për masa ndaj dhunës në marrëdhëniet familjare*”, i cili u miratua nga Kuvendi në dhjetor të vitit 2006. Ai ishte rezultat i nismës qytetare dhe u propozua në Kuvend nga 20 mijë zgjedhës, duke u bërë kështu, një nga hapat më të sigurt për përafrimin e legjislacionit shqiptar me standardet ndërkombëtare në fushën e legjislacionit kundër dhunës në familje.

Ligji synon të parandalojë dhe minimizojë dhunën në familje e të garantojë mbrojtje për të gjithë anëtarët e saj, duke i kushtuar vëmendje të veçantë veçanërisht, fëmijëve. Kjo mbrojtje u ofrohet të gjitha subjekteve të dhunuara, pavarësisht nga gjinia e tyre, si dhe pavarësisht nga fakti nëse kanë qenë apo janë në marrëdhënie familjare. Për këtë, ligji ngarkon me detyra të posaçme organet e administratës shtetërore, të cilat marrin të gjitha masat e nevojshme, për parandalimin e dhunës dhe mbrojtjen e familjarëve.

Organizatat jofitimprurëse, nismëtare të këtij ligji, po ndjekin me shqetësim faktin se ky 1 Qershor, e gjen përsëri shoqërinë shqiptare të tronditur nga dhuna në familje. Ndërkohë, veprimet e ndërmarra nga aktorët që kanë detyra për zbatimin e këtij ligji, janë të ngadalta dhe të pamjaftueshme.

Aktualisht, ka nevojë për veprime urgjente, veçanërisht, në miratimin e akteve nënligjore për zbatimin e ligjit brenda tre muajve nga dita e hyrjes në fuqi të ligjit, pra deri më 1 Shtator të këtij viti. Gjithashtu, ligji kërkon koordinimin më të mirë të veprimeve të rrjetit të organeve administrative shtetërore, të përbërë nga *Ministria e Brendshme, Ministria e Drejtësisë, Ministria e Shëndetësisë dhe të drejtuar nga Ministria e Punës, çështjeve sociale dhe shanseve të barabarta, përfshirë edhe strukturat në varësi të tyre, si komisaritet e policisë urgjencat mjekësore, shërbimet avokatore falas dhe ato përmbarrimore.*

Rëndësi të veçantë, paraqet koordinimi i veprimtarisë së organeve të pushtetit qendror me organet e njësisive të qeverisjes vendore, *bashkive e komunave*, të cilat janë përgjegjëse të drejtpërdrejta për shërbimin social dhe linjën telefonike 24-orëshe për denoncimin e rasteve të dhunës në familje.

Detyrimet e këtij ligji nuk mund të përmbushen nëse nuk vendosen lidhje të qëndrueshme institucionale dhe ura të bashkëpunimit midis organeve shtetërore të rrjetit dhe *organizatave jofitimprurëse*, për krijimin dhe licencimin e të gjitha qendrave, që në bazë të ligjit do të ofrojnë ndihmën sociale, psikologjike e ligjore për personat e dhunuar në familje, si dhe për rehabilitimin e dhunuesve/seve.

Nga ana jonë, ne organizatat jofitimprurëse jemi të ndërgjegjshëm për punën që duhet të kryejmë, për të funksionuar me efektivitet në përmbushjen e detyrimeve që ligji parashtron për ne, por për këtë, kërkohet edhe ndihma nga organet kompetente shtetërore.

Gjykatat janë përgatitur tashmë për të zbatuar këtë ligj, me qëllim dhënien e urdhrave civilë të mbrojtjes, por është e rëndësishme që qytetarët ta njohin mirë ligjin, të ndërgjegjësohen dhe të kërkojnë mbrojtjen e tyre në bazë të dispozitave të tij. Mendojmë se kjo nuk mund të realizohet pa krijuar *trupën e avokatëve që do të ofrojnë ndihmën ligjore falas*, si dhe *licencimin e mbështetjen e të gjitha qendrave që do të ofrojnë shërbime në bazë të këtij ligji*.

Në përfundim, shprehim bindjen tonë të thellë se, të gjithë aktorët, do të japim kontributin e tyre për zbatimin me sukses të këtij ligji dhe puna do të vazhdojë më tej, e gërshtuar edhe me faktorët e tjerë, për të minimizuar fenomenin antinjerëzor siç është dhuna në familje.

Për çdo pyetje, mos hezitoni të kontaktoni:

Qendra për Nisma Ligjore Qytetare

Adresa: Rr. “Vaso Pasha”, Pall. 12, Shk.1, Ap.1, Tirane

Tel. 04 259795

E-mail: avokatore@albmail.com

www.qag-al.org